



UNIVERSITÄTS-
BIBLIOTHEK
PADERBORN

Conceptvs Chronographicvs De Concepta Sacra Deipara

Zoller, Joseph

Augustæ, Anno 1712

XXXVI. Habitavit Arca Domini, in domo Obededon Gethæi, tribus mensibus: & benedixit Dominus Obededon, & omnem domum ejus. 2.
Reg. c. 6. v. 11.

[urn:nbn:de:hbz:466:1-75950](https://nbn-resolving.org/urn:nbn:de:hbz:466:1-75950)



De Conceptâ Sacrà Deiparâ.

CONCEPTUS XXXVI.

§. I. Scriptura.

246. Arcæ DIVINÆ, In Deiparâ,
Benedicta habitatio.

2. Reg. c. 6. v. 11. *Habitavit Arca Domini in Domo Obededom Gethæi, tribus mensibus, & benedixit Dominus Obededom, & omnem Domum ejus.*

Summam Obededomi felicitatem, gaudijque Spiritualis abundantiam quis enarrabit? quando Sacra Domini Arca ad ipsius deducta diverforium, tribus ibidem Mensibus subsistit, omnique Supernâ benedictione non ipsum tantum Patremfamilias, sed universam quoque familiam ejus, ac facultates copiosissime replevit. Hoc enim sacrae nobis insinuant Paginae, ijs verbis: *Habitavit Arca Domini in domo Obededom Gethæi, tribus Mensibus, & benedixit Dominus Obededom, & omnem Domum ejus.* Nec tam insolita Viri benedictio adeo occulta remanere poterat, quin ad aures ipsius Davidis Regis perveniret; sic enim pergit Sacer historicus: *Nuntiatumque est Regi David, quod benedixit Dominus Obededom, & omnia ejus, propter Arcam DEI.*

Verum quid hæc Obededomi felicitas, respectu summæ illius felicitatis, quæ MARIÆ obtigit? tunc nimirum, quando incarnatum DEI Verbum, in electâ Virginalis ejusdem uteri Domo divertens, non tribus tantum, sed novem omnino completis Mensibus ibidem habitavit: Ut enim Divus ait Ambrosius: *Arca intrinsecus portabat Testamenti tabulas, MARIA autem ipsius Testamenti gestabat hæredem.* Sicut ergo Obededom (*Servus hominis* interpretatus) & omnia ejus, specialiter à Domino fuere benedicta, ut gloriari illis omnino Zachæi verbis potuerit: *Ho-*

die Salus domui huic facta est. propter Arcam nimirum Domini, in illâ per tantillum temporis collocatam: sic MARIA (humillima DEI-Hominis Ancilla) & omnia ejus, id est, ejus Nativitas, ejus Infantia, ejus reliqua in terris Conversatio, ejus in DEI Matrem electio, ejus Obitus, imò & ipsa jam ejus, in utero Matris Annæ Conceptio, specialissime fuere à Domino benedicta, adeoque omnis peccati tam originalis, quam actualis, ac per consequens, omnis maledictionis penitus exclusiva, unice propter DEUM, à quo *Salus Domui huic facta*, quique *ventris sub Arcâ clausus*, in purissimo Virginis utero recondi voluit. Et nonne ea ipsa Marianæ Domus benedictio jugiter fuit nuntiata, per Cœlestem illum legatum, Gabrielem Archangelum, quod nimirum benedixerit ei Dominus? ait enim: *Benedicta tu in mulieribus*, causam statim antea clarè adjungens: *Dominus tecum.* Verè benedicta, imò ter benedicta Habitatio! Si enim pro tribus, quæ Arca subsistebat, Mensibus, Domus Obededom simpliciter dicitur à Domino benedicta, facile credendum, ob triplicatum trium Mensium numerum, quamdiu nimirum æternum in Virgine Verbum habitavit, triplicè benedictione donatam fuisse MARIAM, ut hanc ipsam ob causam, non immeritò Salutatio illa Angelica, ter quâlibet die repetenda, sicque tribus distinctis vicibus, ad commemorationem Verbi, quod *caro factum est, & habitavit in nobis*, ipsa Arcæ hujus Divinæ, nempe Verbi, habitatio, benedicta in mulieribus sit prædicanda. Hic appositè commendandam puto singularem quorundam devotionem, ab Ecclesiâ minime improbatam, singulos Hebdomadæ

da dies ita dividendi, ut quælibet speciale Patronum obtineat: sic Dies Dominica communiter Sanctissimæ Trinitati dedicata: Dies Lunæ dulcissimo Nomini JESU, & quæ à Marte denominatur, SS. Angelis recolendis destinatur. Sic etiam Mercurius devotioni Sacri Scapularis: Dies Jovis adorando Sanctissimo Altaris Sacramento: Dies Veneris recolendæ specialiter Sacratissimæ Christi Passioni assignatur: Sabbatum denique Beatissimæ Virgini, debito hyperdulæ cultu, venerandæ, devotis per Ecclesias Litanij, alijsque filialis erga Matrem reverentiæ significationibus applicatur. Porrò quærere quis posset, cur locum hunc ultimum, nempe diem Sabbati MARIA obtineat, cujus tamen dignitas omnium Sanctorum, imò & Angelorum merita longè antecellit? Sed sciendum: illum Sacræ Scripturæ locum hîc communiter observari, quo docemur, universi Creatorem, finito per sex dies Creationis opere, Septimâ die requievissè, adeoque, cum etiam in Virgine Beatissimâ, tanquam benedictâ habitatione, incarnatum DEI Verbum divertissè, ac requievissè sciatur; hinc septimam hanc diem, de quâ ait Sacer textus: *Requirit die septimo.* Item: *Et benedixit diei septimo, & sanctificavit illum,* MARIE assignari. Addo ego, de Creatione, ad Redemptionis mysterium procedens, ideò 7.^{ma} diem MARIE honori specialiter convenire, quia primo loco pro Patriarchis, 2.^{do} pro Prophetis, 3.^{to} pro Apostolis, 4.^{to} pro Martyribus, 5.^{to} pro Confessoribus, 6.^{to} pro Virginibus, laborâsse in opere redemptionis Dominus videtur, Septimo verò loco requievissè, quia opus non erat labore, in præservativâ illâ, ac prorsus specialî purissimæ Virginis redemptione, in qua requiescere & habitare DEUS statuit, cui proinde haud secus, ac Domui Obededom gratiosè benedixit, adeò, ut sine omnî labe, ipsâ etiam originalî maculâ, eam concipi voluerit. Huic Domui benedictæ & nos benedicamus, dicen-

do eam bene Conceptam, ut per Arcam Divinam inibi habitantem, nobis quoque obveniat benedictio.

§. 2. *Authoritas.*

S. ELIGIVS, DoCENS pVRAM 247.
à Labe.

1. *Nequaquam immunda judicatur, quæ Sancto Spiritu obumbrante, totius munditiæ, & Sanctitatis Auctorem genuissè probatur.* Homil. 2. de Purif.
2. *Denique Dominus JESUS, plenus & perfectus DEUS, plenum & perfectum hominem de Matre sine patre suscipiens, plenitudinem, & perfectionem omnium gratiarum ei contulit.* Ibid. Tom. 2. Biblioth. PP.

§. 3. *Ratio.*

In DEI MINISTRO reqVISITA 248.
Capacitas.

SANCTUS DOCTOR 3. p. q. 27. a. 4. in Scorp. *Illos, quos DEUS ad aliquid eligit, ita præparat, & disponit, ut ad id, ad quod eliguntur, inveniantur idonei: secundum illud 2. Corinth. 3. Idoneos nos fecit ministros novi Testamenti.* Beata autem Virgo electa Divinitus, ut esset Mater DEI, & ideò non est dubitandum, quin DEUS, per suam gratiam, eam ad hoc idoneam reddiderit. Ita in veteri Testamento, Moysem, Eliam, Jeremiam, aliosque Prophetas, quos ad specialia munera, & officia deputaverat, singularibus quoque beneficijs, & gratijs communiendo, idoneos reddidit: sic quoque, in novo testamento, Joannem Baptistam, ut idoneus *Præcursor Domini* evaderet, in utero materno Sanctificavit: Apostolos, ut utiles Divini Verbi præcones efficeret, Spiritus Sancti plenitudine, aliisque gratijs supernaturalibus replevit, &c. Atqui eligi in Matrem DEI, infinite propemodum ista omnia enarrata Officia, excellentiâ, & prærogativâ transcendit. Ergò Beata Virgo, ad hoc ministerium electa, ut esset idonea Mater, debuit à DEO majoribus, ac perfectioribus donis, præ alijs omnibus,

Gen. 2. c.

v. 3.

bus honorari, ut indicat S. Doctor cit. q. a. 6. ad 1.^{mum} quòd B. Virgo, quæ fuit à DEO electa in Matrem, ampliorem Sanctificationis gratiam obtinuit, quàm Joannes Baptista, & Jeremias, qui sunt electi, ut speciales præfiguratores Sanctificationis Christi. Atqui alius specialis honor amplius non datur, quàm esse Sanctificatum in ipso instanti Conceptionis. Ergo, ut Beata Virgo sit idonea Mater DEI, debuit, in instanti Conceptionis, à peccato originali esse immunis.

§. 4. *Historia.*

249. ANIMÆ In purgatorio, DEI GENITRICI Charæ.

JOannes Ximenius, devotus admodum, ex Societate JESU, Laicus, Anno Millesimo, Quingentesimo, Septuagesimo nono, pijsimè in Domino defunctus, cum Deiparæ Virgini singulariter esset addictus, coram Sacris ejus Imaginibus, in calidas sese preces frequenter effundere consueverat, id exoraturus, ut rectissimam Salutis suæ viam, Virgine edocente, agnosceret. Audiit porro, die quâdam, Matrem pijsimam, dicentem sibi: *Ximeni! perge, ut cepisti, in viâ Sacrae Obedientiæ; hanc enim securissimam esse salutis semitam, ne dubites!* Id præterea specialiter annotandum, quòd, in ipso omnium Sanctorum Festo, ac Animarum in flammis purgantium pervigilio contigit: Orabat nimirum, die illâ, Ximenius, solito ferventiùs, coram pulcherrimâ quâdam, atque ad omnem pietatem studiosè elaboratâ immaculatæ Conceptionis Imagine; cumque orationem diutiùs protraheret, timens identidem, non satis se, pro miseris illis Animabus, piaculares ignes sustinentibus, deprecari, sequentem ex Imagine vocem audire promeruit: *Ximeni! nunquam obliviscere Animarum harum. Cui mox ille reposuit: Quinimò, Virgo Speciosissima! offeram imposte-rum omnia mea, tam interna, quàm externa bona opera, pro illis, quod per totum reli-*

quæ suæ vitæ spatium, omnî diligentia adimplens, non modicas (ut piè credendum) Animas flammis exsolvit, & Cœli gaudijs transcripsit. Ex quo constat primò, quàm Animæ in purgatorio DEI Genitrici charæ: secundo, quàm grata Superis devota vivorum pro mortuis exoratio, 3.^o quàm utilis Sacrarum Imaginum, ac singulariter Deiparæ sine labe Conceptæ, suâ in Imagine cultus, ac veneratio; cum sibi exinde loquentem Cœli Reginam Ximenius promeruerit. *P. Anton. Balingh. Ex vitâ P. Alvarez. c. 45. & Hortulus Marian. art. 2. c. 2.*

§. 5. *Symbolum.*

Leo IratVs, frænVM
DILaCerans.

250.



Nitens incassum, generoso fræna Leoni
Inijcere: haud patitur talia vincla Leo.
Nitens incassum conceptæ fræna MARIÆ
Inijcere infandi criminis: haud patitur.

Vincula tua dirumpam. Nahum, c. 1. v. 13.

§. 6. *Antiquitas.*

ConstantInopoLI, noVatIani 251.
teMpLI ab Igne
Defensio.

EXorto, Anno Millesimo, Quingentesimo, Septuagesimo quinto,

to, Die 17. Augusti, gravissimo incendio, quale Urbs Constantinopolitana nunquam hactenùs pertulerat, potissimam ejus partem adeò vorax flamma pervasit, ut maxima quæque horrea, & frumentorum receptacula, consequenter & ipsa splendida Ædificia, non pauca numero, conflagrarent. Ubi illud, præ reliquis, relatu dignum, quòd, cum in illo incendio, quidam Novatianorum Episcopus, Paulus nomine, Chrysanti Successor, suam in periculo videret Ecclesiam, atque idcirco in Sanctius Sacrarium ingressus, ut hæc ab imminente igne defenderetur, DEUM simplex oraret, DEUS Optimus Maximus, exauditis, nescio, quâ ratione, precibus, Delubrum inviolatum servavit: Ignis namque per januas, & fenestras jam omnes involans, ei minimè nocuit, sed cum circumcirca Ædificia simul plurima consumpsisset, Templum præterijt: cumque (quod maximum est) incendium, biduum totum, undique grassaretur, nè ullum quidem fumi vestigium in tignis, ac muris Ecclesiæ apparuit. Quo factum, ut Novatiani, ex eo tempore, quotannis 17. à Augusti Die, ob servatum tanto prodigio Templum, solennia Sacra celebrarent. *Nicephorus Callistus lib. 14. c. 41. Petrus Bungus de num. 17.*

Quòd si DEUS quandoque etiam per indignos, quales Novatiani hic fuerant, solita exhibere prodigia voluit, adeò ut Templum etiam illorum à furore ignis, omnia alia devastantis, imò etiam ab omni fumi vestigio præservàrit; An non credendum, in dignissimâ Divini Verbi Genitrice, simile multò magis miraculum à Divinâ Potentiâ perpetratum? ut nimirum solam illam, tanquam Sacratissimum veri DEI Templum, in universalî peccati originalis incendio, non per biduum, sed per tot Sæcula continuo, & usque in finem mundi continuo, illasam præterierit, ac nè vestigium quidem fumi, id est, nè minimum quidem instans originariæ labis illi adhærere voluerit? Quid ni, ob tantum MARIE purè Conceptæ beneficium, & nos Christiani Solennia Sacra quotannis celebremus?

§. 7. *Anagramma.*

AVE arCa, à Labe Defensa, 252
TV repLeta aMoris Igne!

Ave Arca munda: tu impleta amoris igne!

Versio litteralis.

Ave Maria, gratiâ plena, Dominus tecum.

* *
*



De Conceptâ Sacrà Deiparâ.

CONCEPTUS XXXVII.

§. I. *Scriptura.*

253. ÆDes DIVIna, à DEO
ConstrVCta.

2. Reg. c. 7. v. 16. *Fidelis erit Domus tua.*

Quod Nathan quondam Propheta, à Domino submissus, Davidi insinuavit, dicens:

Fidelis erit Domus tua: hoc Cœlestis Pater, jam ab æterno, ad consubstantialem sibi Filium, humanam aliquando carnem assumpturum, dicere poterat: *Fidelis erit Domus tua*. Quis enim erroris me arguet, si dignissimam Divini Verbi Domum, MARIAM appellitem? cum non mea hæc tantum sed gravissimorum Patrum sit sententia, quos inter S. Bernardi-